



## **Lescha davart la recepziun da burgheis per la vischnaunca da Tujetsch**

**Approbada entras la radunonza da vischnaunca ils 14 da december 2018**

**Vigur: 01-01-2019**

## **Art. 1 Principi**

Daventar burgheis dalla vischnaunca da Tujetsch san burgheis grischuns e svizzers sco era persunas digl exteriur e persunas senza naziunalitad, aschinavon che las premissas legalas tenor dretg federal, cantunal e communal ein dadas.

## **Art. 2 Premissas per persunas digl exteriur**

A persunas digl exteriur sa vegnir garantiu il dretg da burgheis communal, sche talas han giu lur domicil duront silmeins tschun onns ella vischnaunca da Tujetsch. El mument cura che la persuna inoltrescha la damonda da naturalisaziun, sto ella esser domiciliada silmeins dus onns senza interrupziun ella vischnaunca. Plinavon ha ella d'ademplier las ulteriuras pretensiuns tenor la legislaziun federala e cantunala dil dretg da burgheis.

## **Art. 3 Premissas per persunas svizras**

A persunas svizras ch'ein domiciliadas el mument cura ch'ellas inoltreschan las damondas da naturalisaziun dapi silmeins dus onns senza interrupziun ella vischnaunca da Tujetsch, sa vegnir concediu ni garantiu il dretg da burgheis sche:

- a) lur extract privat dil register penal svizzer cuntegn negin'inscripziun gravionta tenor gl'artichel 18 dall'ordinaziun tier la lescha davart il dretg da burgheis dil cantun Grischun (130.110);
- b) ellas adempleschan lur obligaziuns finanzialas;
- c) ellas retilan neginas prestaziuns socialas;
- d) ellas han restituiu eventuals susteniments socials dils davos diesch onns.

## **Art. 4 Procedura**

<sup>1</sup> La damonda da naturalisaziun per persunas svizras sto vegnir inoltrada alla vischnaunca da Tujetsch cul formular official ed ils suandonts documents:

- a) attests da domicil pil temps prescrets tenor lescha;
- b) attest dil stadi civil davart las datas registradas dil stadi civil;
- c) extract privat dil register penal svizzer;
- d) cuors da veta;
- e) extracts dils registers da scussion dallas vischnauncas da domicil dils davos tschun onns;
- f) attestaziun dallas autoritads fiscalas davart il pagament dallas taglias taxadas;
- g) informaziuns officialas davart eventualas retratgas d'agid social dallas vischnauncas da domicil dils davos diesch onns;
- h) cumprova dalla tgira genituriala, aschilunsch che quella vegn buca exequida comunablamein dils geniturs.

<sup>2</sup> El cass da naturalisaziuns privilegiadas sto vegnir aschuntau ils documents che documenteschan il fatg da privilegi.

<sup>3</sup> Ils documents astgan per regla buca esser pli vegls che dus meins.

<sup>4</sup> La damonda da naturalisaziun per persunas digl exteriur sto vegnir inoltrada agl uffeci cantunal cul formular official ed ils documents necessaris.

## **Art. 5 Examinaziun**

<sup>1</sup> La suprastonza communal examinescha las pretensiuns e fa ils sclariments necessaris.

<sup>2</sup> La suprastonza envida las persunas digl exterior che fan ina damonda da naturalisaziun ad in discuers da qualificaziun, el qual vegn examinau oravontut l'integrasiun e las enconuschientschas previdas tenor la legislaziun federala e cantunala dil dretg da burgheis. Tenor basegns sa era in discuers cun persunas svizras haver liug.

## **Art. 6 Burgheis d'honor**

<sup>1</sup> A persunas ch'ein sefatgas specialmein meriteivlas per la publicitad ni pil beinstar public sa vegnir concediu il dretg da burgheis d'honor.

<sup>2</sup> La surdada dil dretg da burgheis d'honor ei buca ligiada vid las premissas da domicil da quella lescha.

<sup>3</sup> Il dretg da burgheis d'honor sa haver il medem effect sco il dretg da burgheis obtenius entras la procedura da naturalisaziun ordinaria. Per persunas svizras senza dretg da burgheis cantunal sco era per persunas digl exterior valan las premissas tenor la legislaziun federala e cantunala dil dretg da burgheis.

## **Art. 7 Taxas**

<sup>1</sup> Per decisiuns ella procedura da naturalisaziun vegnan taxas incassadas che cuvieran ils cuosts. Las taxas muntan maximalmein a frs. 2'000.- per persunas digl exterior e maximalmein a frs. 1'000.- per persunas svizras.

<sup>2</sup> La suprastonza communal sa decider per persunas svizras e per persunas digl exterior differentas pauschalas per cass. Per naturalisaziuns privilegiadas san pauschalas pli bassas vegnir fixadas. Las pauschalas ein d'adattar periodicamein tenor las expensas effectivas.

<sup>3</sup> La suprastonza communal sa reducir ni relaschar las taxas per persunas minorenas che vegnan buca naturalisadas ensemen culs geniturs, per persunas en formaziun ni per accziuns da naturalisaziun.

<sup>4</sup> Tier la concessiun dil dretg da burgheis d'honor vegn ei desistiu d'ina taxa.

<sup>5</sup> Per l'elaboraziun dallas damondas da naturalisaziun sa in pagament anticipau vegnir incassaus entras la vischnaunca.

## **Art. 8 Cumpetenzza e comunicaziun**

<sup>1</sup> L'execuziun da quella lescha cumpeta alla suprastonza communal.

<sup>2</sup> Ella communichescha a scret la decisiun sur d'ina damonda da naturalisaziun. Decisiuns negativas ein d'argumentar.

<sup>3</sup> Sche la persuna petenta ha obteniu il dretg da burgheis entras indicaziuns nunverdeivlas ni entras zuppentar fatgs decisivs, rapporta la suprastonza communal quei al cantun entochen sil pli tard otg onns suenter ch'il dretg da burgheis ei vegnius concedius.

### **Art. 9 Vigur legala**

Posseda la persuna petenta buca il dretg da burgheis dil cantun Grischun, va la naturalisaziun pér en vigur suenter ch'ella posseda il dretg da burgheis cantunal.

### **Art.10 Mieds legals**

Encunter decisiuns e disposiziuns dalla suprastanza communal sa vegnir recurriu enteifer 30 dis suenter la comunicaziun tier la Dertgira administrativa dil cantun Grischun.

### **Art. 11 Relaschada**

La relaschada dil dretg da burgheis dalla vischnaunca da Tujetsch sedrezza tenor ils artechels 20 e 21 dalla lescha cantunala dil dretg da burgheis (DG 130.100).

### **Art. 12 Abrogaziun e vigur**

<sup>1</sup> Quella lescha remplazza il reglament da recepir burgheis dalla vischnaunca da Tujetsch dils 15 da december 2006.

<sup>2</sup> Quella lescha ei vegnida approvada ils 14 da december 2018 dalla radunonza da vischnaunca. La lescha entra en vigur igl empren da schaner 2019.